

傳

芳

集

# 傳芳集目錄

## 疏

諫討安南疏嘉靖十五年

駁郭英配享廟神疏嘉靖十六年

明堂享禮疏

## 序

瓊臺志序正德十六年

三祠錄序嘉靖元年

崔清獻全錄序嘉靖十二年

王桐鄉摘稿序嘉靖四年

## 記

重修儋州儒學記正德十一年

目錄

重建萬州儒學記正德十一年

論

節錄平黎事以備後論

節錄撫黎土官事以備後論

節錄征黎事以備後論

平黎總論

墓碑

重修趙考古先生墓碑

詩

五言古三首

謁桐鄉王汝學先生

普湖

傳

芳

集

余自南轅赴撫山東轅郡博吳許鄉人攜酒來送過宿賦此別之  
送蔣耶中南使便歸全州省祖母

七言古

六首

藤作並序

題慈谿顧繼衣追慕卷

題同年戴憲長蒼山賦別卷

送范僉憲西巡洱海

題戰功圖送劉太參歸會川

題守關忠節卷並序

五言律

十四首

次方伯東橋詩

其二

目錄

余自南轅赴撫山東陳都憲原習來代以年誼之厚操舟送至儲潭席間

賦詩見贈步韻酬之

關索嶺

贈許節婦

復周汝實以送饒令人覲詩請校

逢紹之姪

南安趙別駕璧以父母俱上壽同以十一月七日爲生辰繪上壽杯圖馳

獻予同年太守李彥文屬予作詩美之

題莆陽吳知州以寬可以亭

題程孺人貞一

哭黃處士東阜惟堅

鴉小峒

去長清張仲寶陳伯孚來訪

七言律

十一首

其二

閒中漫興

其二

衢州石塘橋

謝陳秉鈞送醜蟹詩

新春詠

紅鷄冠花

和少參陳龍山僉憲張白山遊冰井寺詩

補白沙日哀百姓有序

瓜州阻風以下三首見粵東詩海

寄酬王廷信贈別韻

憶朱南岡少參

目錄

五言絕二首

阻風

題江西雲崖宗室卷

七言絕五首

訪趙忠簡墓

關羽瀨

包茅山

果化州

喜鵲

送周清溪先生福州司訓

五言長律

名公紀遇

題張鶴野鳴鶴圖

### 五言律

初二夕報南川遠行終夜思之至追送白沙又戀戀主暮

贈王指峯司教定安

和鄭篁溪不寐韻

贈符澄溪子赴南雍

過庾嶺有感

甲辰仲夏八日寓黃塘憶洞元吳子歸南海予至此已半月餘矣詩云渡

海蓋遙度之也

### 七言古

送彭密淵別歸

### 七言律

目錄

送彭密淵淡仙適弟存吾以詩約彭赴羅浮武夷予不能赴賦此

自吳季明飲歸有感

甲辰仲秋同內齋至姑蘇江口因東陽年兄擢台佐守之報遂別去台約  
明春訪予於金臺然內齋於東陽舅甥至諗也予於內齋乃白首知己  
也思其別憶其來情自無已詩以將之

舟中探珠子贈陳獨庵

謝人見惠香品

題陳南陽樂園

寓石頭城七夕借輿

和園聚奎子遊學萬軍

贈王指峰教諭得巽字韻

元宵與園天秀老友共月

送廣信吳醫士

傳

芳

集

七言絕

補題曹叔岡鉄拐仙圖

答螺岡寄韻

咏梅

贊文邑韓機調妻朱氏守節詩

五言古

自擬輓辭

新婚別

五言律

客夜

宿虞洞館和戴黃門韻

晚坐

目錄

傳

芳

集

目錄

傷旱

秋夜偶書

觀盆中金魚

## 七言古歌

贈友人遠遊吳楚歌

直鈞吟

壯遊嘆

走筆題友人笑遊海宇卷

## 七言律

答碧山陳翁夜談口號

簡答吳瓊羅

簡五羊梁存吾區白齋詩箋逢和原韻

傳 芳 集

答雙溪兄簡即步原韻

與知友看舊稿

病久與友人語舊

客中七夕

過兄處陪李三吳四諸人即和原韻

懷坡堂與僧半壁語步牛洲翁韻

和月洞仙師韻寄僧無己

訪西林兄樂耕亭竹下看奕即事

昨夜雙溪兄來訪和韻

月蝕

與友人乞素馨花

咏窗前白鷄

自咏海天孤鶴

目錄

傳 芳 集

---

目錄

和行甫侄咏菜

敬題唐西洲公三父子詩集

十二

清王國憲

諫討安南疏

嘉靖十五年

臣竊惟今日。若欲安南修貢而已。兵不必用。官亦無容遣。若欲討之。則有不可者七。請一一陳之。古帝王不以中國之治治蠻夷。故安南不征。著在祖訓。一也。太宗既滅黎季犛。求陳氏後不得。始郡縣之。後兵通不解。仁廟每以爲恨。章皇帝成先志。棄而不守。今日當率循。一也。外夷分爭。中國之福。安南自五代至元。更曲美、承楊、延吳、昌丁、部黎、桓李、公陳、日七姓迭興迭廢。而嶺南外警遂稀。今紛爭正不當問。奈何殃赤子。以威小醜。割心腹以補四肢。無益有害。三也。若謂中國近境。宜乘亂取之。臣考馬援南征。深歷浪泊。士卒死亡幾半。所立銅柱。爲漢極界。乃近在今思明府耳。先朝雖營平之。然屢服屢叛。中國士馬物故者。以數十萬計。竭二十年之財力。僅得數十郡縣之虛名。况又有征之不克。如宋太宗神宗元憲宗世祖朝。故事乎。此可爲殷鑒。四也。外邦入貢。乃彼之利。一則奉正朔以威其鄰。一則通貿易以足其國。故今雖兵亂。尙纍纍奉表賤。具方物。欸關求入。守

傳 芳 集

臣以姓名不符卻之。是彼欲貢不得。非抗不貢也。以此責之詞不順。五也。興師則需餉。今四川有採木之役。貴州有凱口之師。而兩廣積儲數十萬。率耗於田州岑猛之役。又大工頻興。所在軍儲。悉輸將作。興師數十萬。何以給之。六也。然臣所憂又不止此。唐之衰也。自明皇南詔之役始。宋之衰也。自神宗伐遼之役始。今北寇日強。據我河套。邊卒屢叛。毀我籬籬。北顧方殷。更啓南征之役。脫有不測。誰任其咎。七也。錦衣武人。闇於大體。偷稍枉是非之實。致彼不服。反足損威。卽令按問得情。伐之不可。不伐不可。進退無據。何以爲謀。今且令嚴兵待發之詔初下。而征求騷擾之害已形。是憂不在外夷。而在邦城中矣。請停遣勸官。罷一切征調。天下幸甚。

### 駁郭英配享廟祀疏

嘉靖十六年

臣惟自古帝王之興。天必生一代佐命之臣。以爲之輔。故君當大統既成之後。必隆褒臣之典。非但以報其功。亦所以尊崇吾之德業。以昭示萬方也。太祖高皇帝南京功臣廟之建。此謂國之大典禮。今百六十九年矣。天下

傳

芳

集

至今無敢改者。近日武定侯郭勛。無故將始祖郭英。奏欲添祀。以致該部乞請各官會議。不敢遽抑之者。以稱伊祖與元祀徐達等。功同一時。但達等物故。各當廟建之時。而英獨以後死不預。此可欺以方之言惑之也。臣惟皇祖當開基洪武之二年。命立功臣廟於鷄鳴山。論功列祀凡二十一人。塑死者之像。虛生者之位。蓋是時胡大海、馮國用、趙得勝、耿再成、丁德興、俞通海、張德勝、茅成、皆已死。先棲神於下壺。蔣子文等廟後復祀。所謂塑像者此也。而徐達、常遇春、李文忠、鄧愈、湯和、沐英、曹良臣、康茂才、吳復、孫興祖等、俱現在。所謂虛位者此也。是當論祀之時。已合死生者之功而定之矣。勛何據而爲此言哉。及細讀勛奏。稱英于洪武十七年。論功開國受封。至永樂改元始卒。非功有優劣。實死有先後。然後知勛乃不學少知之誤也。蓋洪武十六年。雲南既平。次年論功。以大將穎川侯傅友德、進封穎國公。而于副將已侯之藍玉、仇成、王弼、許儻其世。論及偏裨。謂陳桓、胡海、郭英、張翼等、兵興以來。屢經勤苦。今勳績尤著。桓封晉定侯。海東川

疏

三

傳

芳

集

侯。英武定侯。翼鶴慶侯。子孫世襲。食祿各二千五百石。蓋廟之定祀。至是已十六年矣。而英始侯。其所論者乃雲南之功。而勘誤以爲開國也。且大明一統志。天下郡縣。例書人物。故鳳陽志。英蓋各以其地言。尹直、楊廉、所著皇明名臣錄。俱不載英。惟黃金、開國功名臣錄。五百九十三人。凡建功於國初者。不論大小皆錄。而英亦預。蓋各以人言。皇明祖訓。首章議親條列下。開列三公二侯五家。而英以皇妃王妃駙馬之貴。其家亦預。蓋專以親言。俱以廟祀無干。而勘皆泛引以爲證。又惑也。又太廟配享。當廖永安未除之先。凡有一十三人。其已死。廖永安、俞通海、張德勝、桑世、耿再成、胡大海、趙德勝、七人。於洪武二年正月丁未。太廟之享。已躋在配。至九年始加封號贈諡。而徐達、常遇春、李文忠、鄧愈、湯和、沐英等六王。則各隨其卒之年進侑。皆皇祖親定。卽古廟爾祖從享祭子大烝之義。比之廟祀。其與尤重。英於廟且不祀。而又欲望其配享。豈不尤惑也哉。前代帝王之舉此者。當龍虎風雲之會。篤山河帶礪之盟。如西漢元功十八之位

次。東漢雲臺三十二。及唐凌烟二十四之圖畫。至今昭垂青史。然皆託褒揚於位貌。而我聖祖之享祀。則以血食寓褒揚。其酬報尤重。故品別尤精。位次參差之間。尙不可輕以移易。况無有之額。敢得而增損乎。使勛而知此。縱英侯功先于開國。亦當俯首歛避。况後以南証。而敢啓口也哉。伏願皇上於英之配享廟祀。且寢其議。則勛知孝而不知學之誤。亦可洗雪以終全臣節。而我國朝之大典禮。足爲史冊之光矣。

明堂享禮疏

嘉靖十七年夏  
見明史禮志

三代之禮。莫備於周。孝經曰。郊禘后稷以配天。宗祀文王於明堂。以配上帝。又曰。嚴父莫大於配天。則周公其人也。說者謂周公。有聖人之德。制禮作樂。而文王適其父。故引以證聖人之孝。答曾子問而已。非謂有天下者。必皆以父配天。然後爲孝。不然。周公輔成王踐阼。其禮皆爲成王而制。於周公爲嚴父。於成王則爲嚴祖矣。然周公歸政之後。未聞成王以嚴父之故。廢文王配天之祭。而移於武王也。後世祀明堂者。皆配以父。此乃誤會孝

經之義。而違先王之禮。昔有問於朱熹曰。周公之後。當以文王配耶。當以時王之父配也。熹曰。只當以文王爲配。又曰。繼周者如何。熹曰。只以有功之祖配。後來第爲嚴父說所惑亂耳。由此觀之。明堂之配。不專於父明矣。今禮臣不能辨嚴父之非。不舉文武成康之盛。而乃濫引漢唐宋不足法之事爲言。謂之何哉。若獻皇帝得聖人爲子。不待稱宗議配。而專廟之祀。百世不遷矣。

序

瓊臺志序

正德十六年

郡志自國初至是亦編矣。而必須此焉者。欲備也。唐人稱郡僻無書。至宋瓊築志。萬州圖經。元人又不能蓄。邱文莊公晚年嘗言。已有三恨。郡牒未修一也。桐鄉王公載筆數十年。錄郡事警官志。前後擅易之陋。廼命所集爲外紀。以自成一家之書。孫戶部九峯先生。嘗托前守方公爲梓而不果。後守王公取閱其書。謂獨詳於人物土產。而他目仍舊。乃迎公於於東嶽祠。禮郡舊秀充分纂。而吾與焉。及首啓沿革。而公於建武復縣。執舊疑史。與衆不合。擱筆延月。僅授序答守以歸。適逆瑾敗。召起使催余就道。守亦離位。而事寢矣。余乃蕪採芟於知友唐鵬翼氏侯異日重修後自淮漕得告歸。謝邦君以督府檄。禮余纂就而未果。適王巴山、汪東泉二憲伯、上官大守、三先生繼志懇成之。余惟志、史事也。例以史。而事必盡乎郡。故以外紀備

序

七

傳 芳 集

序

八

舊志。以史傳備外紀。以諸類書備史傳。以碑刻小說備類書。以父老芻蕘備文籍。如地切倭岐。而述海道黎情之詳。急討禦而具平亂兵防之備。隱逸附以耆舊。不遺善而且以誘善。罪放別於流寓。不混惡且因以懲惡。田賦及於雜需額役。以書民隱。紀異及於災異禎祥。以顯天心。首表以括邦綱。殿雜以盡鄉細。非徒例史以備事。而且欲徵倣史以寓義。蓋體文莊而將順其欲爲之意。尊桐鄉而忠輔其已成之書。以求紹述於二公。第愧淺陋。常感古人掃塵之喻。謂塵掃矣。而即隨有。況有之而未能盡掃乎。凡書皆然。況志又古人之尤難者乎。此所以雖日乾乾。得庠彥鍾生遠。張生文甫輩。助余之不及。然終有負於諸公之望也。雖然。亦幸其督成此以有待也。後之同志者。感今日欲備之意。則非惟紀將來之事。必如炎漢前後。共成一書。赤城新舊。各爲一志。以體桐鄉外紀名書之意。或於此書而有恨焉。亦安忍不爲之補遺考異。以續其全哉。則古人所謂欲待備於後。而反愈不備於今者。不惟無意。而且有所望矣。豈非諸公日拳拳之意所召哉。

案序中言前守方公名向，後守方公名子成。謝邦君名廷玉。上官太守名崇，俱正德間任。王巴山名宏，汪東泉名克章，一爲按察司副使，一僉事，皆正德辛巳十六年任，與志成年歲相合，王國憲注。

三祠錄序

嘉靖元年

三祠錄者，三祠所祀事也。仰止祠在郡學。祀王公義方以下四十人。主於崇德以勸士。先賢祠在道右。祀路公博德以下十九人。主於報功以慰民。皆舉於有司者也。景賢祠在郡西北。祀蘇公軾、丘公濬二人。主於著述以憲後。奉於朝廷者也。有德者非無功。所重在於德。有功者非無德。亦猶德之於功也。有德者必皆有言。言至著而爲書。則有功於憲後矣。惟其主於德與著述。故不別曰宦曰寓曰鄉，凡當是者即祀之。惟主於功必有位。乃能同先賢之祀。非啓土定亂之名將。卽按郡守牧之循良也。名宦鄉賢。他舉分祠。今祠仰止。以德故合之。凡名宦舉合祠。今仰止先賢以勸報。故分之。凡祠無錯祀。仰止以著述。故兼之。吁人之所以不與草木同者。賢而有名不朽。

耳。不朽而且饗以廟。賢之尤賢者也。吾一郡城而三祠之賢。至五十有九。不謂之多賢國乎。客賢自漢凡四十五人。其過化之遠。此所以致鄉之有賢也。主賢自宋凡十四人。其聲應之遲。益見教化賴於客賢也。庠彥鍾生遠。張生文甫輩。與余同事於郡史。而考知諸賢之精詳。今年春既請更定祠祀。而又爲此祠錄。以見祠之所以立。祠祀之所以行。其有志於賢者乎。昔宋廬陵文信公。兄時見其鄉有忠節祠。祀歐陽文忠。楊文節諸公。即忻然慕曰。沒不俎豆其間。非夫也。後果以大忠鳴世。至今並食其廟。諸彥淵賢矣。抑有志於此否乎。吁昔鄉在宋無一賢。而先輩尙能感客化以有立。今賢盛賓主。其感不尤易乎。感之易而勉以成之。使生雖無事於此。而百年之公論。能舍之耶。吾言雖爲汝錄發。亦因以告郡之諸豪傑。使知無負於吾地之靈也。因爲序。

崔清獻公全錄序

嘉靖十二年

菊坡公吾鄉先民。史稱晚出番禺。屹然有大臣風。竟與唐張文獻公。異代齊

傳 芳 集

名。予少知慕之。而喜見其行狀於門人李文溪者。後讀其本傳。而知其狀之未備。及觀宋立齋先生校增公言行錄。又知雖傳亦不能備公也。公平生以博大端純之學。而勵之以嚴霜烈日之操。故清明在躬。日底深造。而不可量。以朝署則審諤。以郡縣則字牧。以刑憲則風采。識者已以經濟望之。及選撫淮也。力阻和議。大備內修。遂截然長城淮左。金人不敢深入。以蜀變而推帥也。至則叛者帖然。首睦將帥。凡附循儲積捍敵之數張。既宏且要。全蜀之命脉精神。遂倍。一虜不敢窺西蜀。蜀人比嗣於忠定清獻爲三賢。及歸鄉郡。驚變於摧鋒。登陣一諭。羅拜遠遁。噫。公何修而得此哉。文山一代偉人。獨稱公德之盛。輝映一代。則知士之無本。徒欲乘機會智術。以取耀於一時者難矣。而世之多公者。每以不屑相位一事爲重。至稱爲千載一人。又推其隱意。比之叔臯。然公自撫蜀乞祠。終於禮書不赴者。已在茂陵之世。理宗之立。蓋儻成於后相一時之奸謀。與魯宣親見喋兄血而就之者不同。端平之傾心延佇。在史彌遠既死之後。然帝之多慾。如真魏

極一時之賢。皆不能久於其位。宋至是爲何時。且一艾不蓄。而七年之病。尙可活耳。觀公素以末路結果語其弟。臨終又戒子姪以勿仕。則其沉幾以自信者。不待他推其意。而已巍然如泰山之重矣。若徒區區以不屑跬武相位爲公榮者。其末也哉。是錄哀狀傳言行。而益以新得者爲較全。余久得之於蒲圻胡大參廷獻。凡入滇入京復廣不離筭。今至贛始出與教官吳誠、楊昱輩校之。而付邵憲副繡梓。以廣其全。蓋以公非但可師於吾之一鄉而已也。

王桐鄉摘葉序

嘉靖四年

文章自六經以後。作者多矣。間有稱爲大家者。豈特監其辭哉。文運與世運相關。豪傑應時而生者。天資既邁。而其趨向之專。積累之厚。宏博蘊蓄。遂肆所發。大則鎔經以伸理。小則闡道以論事。在己若不經意。而旁觀者已若星斗江漢之不可探矣。近世於作者。莫不鄙其相習於淺小。未足及乎古人。殊不知既欲負其名。而所學不博。所見不高。則借艱深以文其淺陋。亦

傳 芳 集

豈勢之得哉。吾鄉王桐鄉先生。棄世二十餘年矣。余久得藏其遺稿。近於學政之暇。始出而編次之。讀之若尋常。無可驚異。而大方家每服其詞之平易溫雅。氣之光明俊偉。當比擬於古諸大家。蓋先生自少穎邁。正統末弱冠以禮經魁鄉闈。與陳石翁同庚俱英妙。榜中稱爲二俊。尋游學京師多年。祭酒吳節、司業閻禹錫、屢擢爲元。名譽大振。偶銓選佐郡。所至惟行道惠民。公餘手不釋卷。或行部所至。物無一嗜。獨携書自隨。舟車滿載。文雅德譽藉甚。雖低徊於廣、閩、江右、高涼、邵武、臨江、諸郡之間。二十餘年。一官不徙。而去多遺愛。及薨悼艱喪。獨令人咕嗶聽之。則其所以得此者。豈偶然哉。余嘗嘆後世文章。自漢司馬子長。至唐始有韓昌黎。可謂難矣。逮宋文人酷嗜韓文。莫深於穆伯。莫醇於歐陽。莫博大於眉山臨川。先生生乎其後。師法有年。其內蘊闔深。而外則無一字相襲。有續我皇明文衡之作。諒不能遺此。而獨具卓識。論文者必能辨其家數之所自。謂非一時之傑出。豈公論乎。但其平生所作。如鷄肋集、經籍目略、瓊臺外紀、庚申

傳 芳 集

---

錄、金川玉屑集、家塾原教、及珠崖錄、已經進御、今皆不能盡擇也。故曰摘  
稿云。

序

重建儋州學記 正德十一年

儋瓊之屬州也。宋蘇文忠公南遷時。瓊士僅得姜公弼、黎子雲、王公輔、符林數人。而黎王符皆儋產。公於子雲載酒問奇。尤加敬焉。昔揚子雲論棄朱崖爲捐之力。否則介鱗易我衣裳。公不然之。蓋有感於此也。厥後王儼舉符確輩繼出。儼遂爲名州矣。而况積至今日之盛乎。正德乙亥冬。湘源蔣侯。以郡節推攝州事。感俗之舊。與士之良。可大造也。以學宮雖前守陳侯充內遷之便。然大如殿堂。尙未就。何以訖所教事。乃肆力繕完。且次舉庶齋門號諸建。以備其制。迨至明年春。卽告就。命其庠吳壽椿、李一夔二士。來請記。余惟治固莫先於立學以教士。然學宮特以聚教。而六經則所以爲教也。漢武承秦後。能興學以啓後世。隆儒之美。可謂盛矣。然當是時。博士雖置。而尙書古文。詩毛氏。春秋左氏。皆不列於學宮。世讓之者少。兩漢之士。所以喜功名而不通時變者。則學焉而不知經之過也。情陋於辭章。不足爲道。獨恨宋以文儒立國。何至慶歷乃始知立學。維時天下郡縣。且多假公

濟私。苟且應文。觀文忠在儂有士如此。至遊城東學。尙有僕闕徒散之嘆。餘可知矣。未幾新經行。而周禮春秋又廢。則其所以爲教者何物。痛哉。我太祖方天戈指婺州。卽開學。延葉儀宋濂爲經師。太宗繼又表章六經。頒賜學校。非獨恢耀武功。自開闢以來所未有。則文教昌明。尊經之隆。自漢以降豈有能先之者哉。百五十年來。文化浹海內外。侯於是州。又能拳拳獨宣右文之意。儂雖荒陋。亦應倍加奮躍。況儂在前兩塾無人之時。士之忠信已如此。今復爾。則所造尙可量哉。侯諱縵。字世榮。識敏而政通。在郡甚得人心。余尤重是興。故因求記而推言學之所教。以成其志。使州之民俊遊斯者知重六經之教。得身心倫理之大。不爲章句利祿之謀。則學而爲賢爲聖。仕而堯舜其君民。是則天下士矣。豈徒自慶曰瓊之有士始乎儂。瓊之士亦莫盛乎儂。如蘇端明析樞密輩。當時之所稱與而已哉。

### 重修萬州儒學記

帝王之治天下。未有不本於學校。故家黨州國之學。徧於天下。然後造之



傳 芳 集

進必自癸論秀始。此治道莫先於養。而州黨庠序。尤學之所先也。漢自文翁守蜀。起學成都。招下縣子弟講習。始啓武帝郡國立學校官之令。其時去高祖七十餘年矣。宋孫奭乾興間守兗州。私建學舍。聚生徒講書。卒致仁宗郡縣之學徧天下。其時去藝祖亦八十餘年矣。高帝初登極。天下郡縣之學。卽與太學並舉。其深知致政之源。過前代遠矣。夫漢守臣。尙能自興學以啓其主。顧以英君開先如此。臣下可緩於體奉也哉。萬州宋舊有學。成化初始移今地。稔餘四十矣。頽廢未有舉者。正德壬申無錫余侯。來守是邦。走謁感愴。乃白之分臬。修葺大成殿。明倫堂。二齋之損壞者。重造兩廡。楹星門牆。泮之頽廢者。創造儒林坊之未有者。落成校官廬。臣周隆輩。來乞予記。惟守令六事之職。莫先於學校。今之遊泮者。凡視宮牆之圯廢。必責之所司曰。彼固此出也。今吏而忘儒矣。及其吏之儒。比比皆然。今侯獨能心翁與奭。不負聖祖如此。願遊學者。可不以兗蜀之士自待。而責侯也哉。且是役也。費以已措。而民不知與翁奭省少府用度。贍以已奉。其德同矣。

記

## 傳

校官皆銓注儒碩。與翁奭買蜀物遠京博士。乞大學官爲講師。其勢異矣。究固鄒魯舊墟。當漢初俗猶夷蠻。如今萬之久沾文教。其時又異矣。且地氣與世運。皆由北而漸南。駱越九郡。羈縻于漢武帝。郡國學校。立官之令。雖未及。而董生諸彥。節操已有可觀。唐制嶺南州屬中下學。僅四五十人。宋廣南路學官僅一人。而吾粵之張文獻。余忠襄、崔清獻諸老。已爲名德碩輔。瓊學始於慶曆。至紹興末。始有教官。而郡之姜公弼。州之陳庚輩。繼有聲塲屋。及今數百餘年。文教大盛。郡士有賢相名儒。聲施海內。州士亦繼登甲科矣。上科文塲偶否。州運今復振興。癸酉鄉薦。有文廷偉則未然之盛。將有加粵者出。豈但如蜀士得翁之校官。有至郡守刺史而已哉。多士其勉諸。侯諱忠。劉瑾時罷蘄守。後復起改知萬州。今陞瓊州府同知。才行之見重於人者。蓋有素云。

## 集

## 芳

論

節錄平黎事以備後論

從顧亭林郡縣利病書錄出

元至元二十八年，瓊州路安撫使陳仲達，詣闕，陳平黎策。五月戊戌，授以海北海南道，宣慰使，都元帥，命同廉希恕等，將蒙古漢軍順化軍七千二百人，十月丁丑渡海，益民兵一萬四千，收諸黎所未附兵將，集而征調，十一月壬子行湖廣行省平章闔里吉思，以分省督師至，令仲達子謙亨，領萬戶，統諸兵副元帥王信伯，顏子思，萬戶教化孫韓旺，楊顯祖，副使林應瑞，副萬戶秦彪，千戶蔡有闔，鎮撫高祐，廣西宣慰楊廷璧，分兵統剿，自本月庚午發師至。又明年癸巳七月辛酉，被召還朝，乃以餘賊付都元帥朱斌，統兵深入，人迹不到之處，黎巢盡空，明年甲午春，刻石五指黎婺而還，是役凡三歷年，剿平各州縣清水等峒，符十九，符察，陳萃，梁六積王郎，王嗣，陳子淵，黎福平等渠魁。降附者不可勝數，得峒六百戶口二萬三千八百二十七，招收戶口一萬二千四百九十七，從省募島古孫

論

澤議立寨學訓諭諸峒，奏置屯田，府立定安會同一縣，萬全一案，唐胄論曰是役也。自開郡以來所未有。然計兵僅二萬一千二百人。計時雖二十六月。然實用兵纔十三閱月。專持蠶醜已無遺穴。人言瓊黎黨渙易制。信然。使繼制之以良材。則瓊今日倘有黎乎。奈何以統制付之鴛毒土人。僅數年間餘黨王文河、王應加復起。釀成至順之禍。遂沿亂以俟元亡。痛哉。史世祖紀載命廉希恕別十八里符兵同征。而舊志及碑文。皆不及。豈非以他故不果來。將陳仲達在道之請。而速督之以闔里吉思歟。

### 節錄撫黎土官事以備後論

明永樂二年冬十月太學生崖州人潘隆本、建言招黎請行十二月授隆本以知縣職、各資勅招撫瓊州府黎峒生黎、

三年春三月、隆本引本土人邢萬勝等、赴京復同領勅招撫、

夏四月辛卯、廣東都司奏瓊州府屬縣七方等八峒、生黎八千五百人、崖州抱省等十八村一千餘戶、俱已向化、惟羅活諸峒生黎尙未歸附、上

命禮儀已歸附者，令有司善撫黎黎歸附者，仍遣人招諭，禮部奏，遂遣梧州府通判劉銘資勅往諭之。

四年三月，瓊州屬縣生喇黎首羅顯許志廣、陳忠等，二十八人來朝，初以生黎多未向化，遣通判劉銘資勅招撫，至是向化者萬餘戶，顯等從銘來朝，且乞銘撫其衆，上從之，授銘瓊州府知府，專職撫黎，仍授顯等知縣，縣丞，巡檢等官，賜銘冠帶鈔幣遣還，自是諸黎感悅，相繼永歸，仍勅陳忠等歸諭村隅人民，免其供應差發。

六年春二月，瓊州府撫黎知府劉銘，率生黎喇首王賢祐、王惠、王存禮等，來朝貢馬，命賢祐爲儋州同知，惠存禮爲萬寧縣主簿，賜冠帶幣鈔，俾專撫黎人。

洪熙元年定安黎賊王觀苟等叛，燒燬縣治，都指揮程永，率指揮黃瑀等，督軍討平之，繼移兵征樂會等縣上耶等村，王莫等寇隨平，宣德四年以峒黎侵擾不利，革去撫黎流官。

正統五年瓊州府知府程瑩、奏革撫黎土官、黎人自是總歸於府、民黎稱便、

十年知府程瑩指揮陳英、論撫崖州黎首扶危向化、召回逃民羅討等、四十八名、

唐胄論曰、撫黎土官、其百餘年之禍根乎、永樂初、勅諭不給於招者、而給所招之黎、職名之加、則威以專一、撫綏不得與州縣事、此皆防微杜漸之深意、及來歸後、果詔奪其勅以威已列于銜座以敵縣、皆踰制命矣、此程瑩奏革所以爲便也、然土官雖革、而土舍隨後養成惡逆、犯法數多、不可以不裁抑明矣、然唐之首領。宋之峒首統領、皆以黎人主黎、故其侵郡也、乘其衰而後發、今之土官、則以郡之奸人爲之、故其掠郡也、皆在盛時、而不憚土舍、縱肆於已革土官之後、張威如其祖考、苟爲不問、終於天討、則宗社且不能保、况餽口之小利乎、此兵憲之責也、

節錄征黎事以備後論

明正德七年春，兵備副使詹璽，征萬州黎賊，初僭賊符南蛇叛萬州諸黎皆嚮應，後僭既平，萬未經過師，故鷓鴣啼龍吟等嘯黎，鄒那忠巴休等復出，至宏治甲子，殺督備指揮谷泰，後愈構樂會縱橫斬對陵水黎亭嶺脚等黎會應勢日昌熾，督府因被害民王昕等奏聞，至是始委璽統官軍快黎等兵，約五千征剿，三月癸未，遣指揮王璠等四路分進，期癸亥會哨於中地草唱，爲土舍泄機，賊多屯匿於樂會縱橫峒壩口村，大連山麓，乃故導西哨指揮趙榮，由曲改難兵地眩賊悉之，全哨因曳兵走出，熟黎長沙村，逗遛不進，東南二哨指揮高煥，周世英，千戶王詔等，是日亦止遠營於地名太平村，隨征指揮陳孤入窺空村，見數賊先馳歸，隨旂軍王佐，吳朝京等衆遇害，既夕賊乘劫民兵等營，殺傷數多，煥等遂擊往南山路出，惟北哨指揮王璠如期抵會所，見賊空巢焚之，時璽駐北於此地名張牙市，聞太平營爲賊所劫，遂散帥而歸。

唐胄論曰，嗚呼黎賊連年肆寇。然時或少患者。以大軍之來臨也。今而此舉

命不能用之於將帥。反驚散於賊。黔驢技露。而猛虎愈無所忌矣。孰若不征之爲愈也。今言黎患。多歸罪於宏治末年之備兵者。由此觀之。則所以積大而釀長之者。此皆彼之罪哉。

平黎總論登瓊州府志

彝獠降而判者數矣。當草薙而禽獮之。非絕其根株。弗可止也。蓋地嶮島無援。其勢彼高而我下。彼內而我外。大海之險。我與共之。桐鄉所謂常與我爲賓主是也。故在元彼主而我賓。唐宋則彼賓而我主。南朝主賓勢敵。漢則彼全主而我無賓矣。至弘治南蛇之亂。殺傷方面。流毒連年。郡城爲之驚動。亦將隱然賓主之勢。使不根株絕之。安能保其滋蔓。不復已然之跡乎。故觀歷代征討之師。未嘗不屢爲恨。蓋完澤統四省新銳之兵。當四年倦勞之寇。若乘其懈而剪之。勢如破竹。納間受降而歸。此可伐而不伐者也。咸通回將深入。所向無敵。毛伏羌旣覆蛇賊之巢。通黎已喘息待命。一則僅置忠州而還。一則恨止於鄉人之舛奏。此伐之而不盡也。平章

至元之師。刊石五指黎婺。抵千萬年人跡不到之處。雖能立學府縣案。然任用土人誘亂。終元之世。是能盡伐而不能處之也。三者之機。既失而不可得。日受之患。又急而不可待。亦惟體既往之悔。爲今取勝之全而已。蓋郡之中黎。號爲遐岐者。自不爲患。常慮熟狙招釁延禍。故絕不與黨。今當歲熟四五月之間。必出我軍戍進。而穫彼以屯。至秋大熟亦如之。則彼之深潛內地。不餓死于叢菁之中。則必延頸於旗鼓之下矣。其法自易而及難。自外而及內。數年之間。不惟熟狙不能作梗。雖遐岐之深。恐亦無所逃矣。然則何時而可能乎。郡之主牧在筭帥在厚其本。以爲吾之不可勝道之主兵在憲節在斷其謀。致彼之必可勝。然其人必如按攤之威望。而兼塗棊之材與志。又加之以朱國寶之權且專。計資勳以崇其秩。積歲月以成其事。練軍訓士之精以足兵。免京司廉之運以積食。又得如黃文廣馬撫機譚汝楫輩。爲之偏裨。以充任使。則大勢已立。然後相機隨勢。常則如吾前之所言。緩而取之可也。變則乘勢急以取之。如韓雍所謂

必使盡數剿滅。種類不遺。陳仲達所謂假神兵數萬。可使悉平可也。取之緩。則其歸也必誠。歸如納仲期仲文之降。而使之自食其田。恐亦無害。取之急。恐其服也非心服。高雷羸田常病於無佃。則分而置之。如漢徙潞山蠻七千餘口於江夏可也。如是則大通朱永嘉之路。多立唐咸通之州。深移曾臨汀之屯。增置吉思之寨。分立孫澤之學。無爲而不可矣。凡此非利古所未有之地。而忍爲此也。以欲安吾閩郡之民。而不得不爲此也。非忍於爲。而且有不爲之之罪。不得不爲。而又有爲之之利。然則今之豪傑。能爲者。亦何願望而不爲之早計也哉。

重修趙考古先生墓碑

登郡志黃通志  
正德十五年

姚江趙考古先生謙。洪武末司教吾邑。一日語諸門人曰。太虛不能不聚而爲人物。人物不能不散而爲太虛。吾不久當歸吾元。尋果卒。弟子不忍去其柩。爭負土留壆。哀泣若已父焉。余少知慕先生之道。而恨郡乘之失紀其藏。及讀裔孫宏翰上邱深庵書曰。墓荒榛棘。而識者日寡。未嘗不扼腕以嘆也。正德庚辰冬。賀少參、汪僉憲二公。來按郡。皆篤慕先生者。余獨與談及。而共咨嗟。未幾卽得其藏於舊學之東北隅。隱見於叢家側。餘於犁鋤無幾矣。乃基石崇封而碑題之。補前地之侵墜者。甃以甃石。隨道爲臺。斬然以秩。時目擊者。感當日負土之心。戚戚感然曰。藏幾百三十年矣。而古則之英靈。今不終掩古。預有不墮之數。蓋如此。又曰所謂太虛聚而爲人。不徒恃乎形。先生蓋自有不隨死而愈顯者。斯藏之不闌未爲泯也。今皆不然之。先生少慕考亭之學。肇博於六書。而會之於六經百氏。又約之於造化經綸一圖。羽翼聖道。當時高皇帝與臣宋濂解縉。皆知重之。及謫教吾

傳 勞 集

碑

二八

邑。首啓王憲、吳文祥。諸賢之傳。愈衍愈盛。各以所得。皆足名世。故評都  
芝風教。謂文化洽於唐宣宗。禮樂盛於宋中葉。而文風則不變於先生。其  
有功於吾土也大矣。功之大。則思之宜深。然世遠跡滅。而漫焉者勢也。  
故古人論保思之道曰。讀其書。置其像。甚至知其鄉里。與形之短長大小美  
惡。及平生之所嗜好。以想見其爲人。而使存之於心。況茲骨肉所斃之士。  
豈不猶切近焉而易感乎。故茲藏顯於墓道之誠。豈非其數。又因起人思慕  
以向道。則其自有顯者。寧不藉此而益顯乎。其於世教之關係何如也。余  
觀前代於前賢之墓。建漢白社思賢之碑。築宋能仁限牧之墻。嘆豪傑之扶  
掖教。每作人於風聲意氣之外。古今大畧相同。未嘗不憫簿書之碌碌也。  
通判俞侯。謂古則之賢。固不讓於古。而二公闡斯藏於旣泯。功視古尤倍。  
余不可無言而使之泯也。余蓋有感於豪傑。愈寄遐思。而不能忘者烏敢

陳。

謁桐鄉王汝學先生

名佐，臨高舉人，官邵武同知。

鄉曲仰前修。每恨時不遇。再濯湄邱波。三洒深庵涕。巋然賴公存。碩果堅固蒂。渺以一南儒。京師避頭地。囊括天下士。尾閭收無際。耿耿胸中物。落落湖海氣。汲古修綆深。董馬在伯季。胡爲柄鑿殊。明眸塵土蔽。坐使萬夫特。一麾老下吏。掛桑長弓閑。刈刈漑盧利。平生五車書。一策用未既。語賸何須多。盈箱將將竄隸。對此鷄肋盤。佳味天然醜。玄牝希夷精。侯鯖屢護致。隨伸信手長。阿育青螺髻。玉屑鳳腦香。芝絲駝囊賦。一啖瘞百疴。豈但惜擲棄。事久真乃出。誰能障一袂。所以南豐老。終與歐蘇儷。憫頽上帝心。說來箕失麗。含章不一舒。括鑿造化忌。願將萬斛泉。起作一流滯。震澤入三江。大海會源系。神龍起九有。霖雨乃餘漑。文墨雲祊孫。敢爾托木契。所以啓玉壺。刀圭期一噴。步進百尺竿。紹乏狗可繼。

普潤

詩

詩

去年過西泚。今年來普瀾。青山幾萬里。應笑人能通。人生苦飄泊。何異雲從風。霖霖滿中庭。倏然西以東。回看蓋穀英。白首何從容。豈不自念惜。皇恩誰終窮。風雲積上惡。沙石關塞重。奮激何家爲。脾肉嗟重生。劍未血郵支。老驥終槽騰。平生報主志。豈在金印封。蒼生何時寧。白髮日夜生。勉旃復勉旃。無愧桑與蓬。

詩中二押生字古詩多有生字古韻通

余自南贛赴撫山東贛郡博吳誠以鄉人携酒來送過宿賦此別之

宦轍每相逐。前同任 廣西鄉緣獨何奇。竹枝插老菊。天亦憐衰癡。吾子胸中秀。

清荷吹漣漪。健鷗秋氣雄。方欲凌雲飛。携樽不能勸。春風吾自卮。無端

桑梓談。鼓角星河低。滔滔觸人聲。一夜楊梅磯。收鎮 縣上明朝古處州。旌旛看

青齊。

## 送蔣郎中南使便歸全州省祖母

上界清且永。而無紫金榮。下界人倫樂。光景何忽忽。乃有太白精。托居人世中。淑履本大篤。閱世真青松。靈籙紀鮎背。綠玉遺鳩筇。前年少子貴。霞被馳皇封。今年長孫歸。負弩驚村翁。歲歲初度嘉。仙桃熟新冬。敬此來趨晏。稱觴羅孫叢。巾襦幾葉聚。蘭芝炫紺瞳。瑤池寧有此。塵區美無重。酒酣歌吾詩。鹿舞令威從。

### 籐作並序

隨書昌化縣註，藤山，唐振州貢藤盤未聞爲害，萬州藤作名天下，始於近代，官役勞及婦人，連年不得休息，正德初有王氏女，尤妙手工官派多且細，過限父累被責，女傷怨遂雉經。

劍門藤絲如髮細。纖巧爭先出新意。萬安土瘠民多貧。家家藉業爲生計。

詩

三一

織纈閨指稱絕奇。牡丹在染鳳交瘡。官工家派多精緻。綢緞過限爹遭笞。  
十八嫁裙無一幅。朝朝暮暮勞官役。豈知生業反爲廢。遂甘自盡家難息。  
滿城感泣增悲恫。禍州尤物何時窮。英靈胡不上訴帝。條蔓枯盡山爲童。  
九州歐貢古來有。篋薦隨方那敢後。交州荔支建州茶。驚塵濺血民始咎。  
珠崖地在大海中。漢因玳瑁始開通。未幾鴉起廣幅布。東都復縣伏波功。  
永平濼觴儂耳貢。後啓縉紛非土任。瑁官珠殿尤苦劉。紫貝鬣皮聊緩宋。  
惟我祖宗憐遠土。兩朝優詔特矜楚。公使踰法許具聞。氣焰權奸猶歛阻。  
後至先皇弘治初。大禁貢獻民熙和。振儉金香罷唐例。南寧銀蕙無宋科。  
民顛優游三十載。肇此厲階誰復再。公賄私貢恐已遲。誰體聖心存海外。  
妻號兒哭無朝夕。催吏那知更下石。誰能臨武叫天閭。守有徐方留郡跡。  
君不見女苦吉貝男苦苧。停車請免崔相公。前朝舊事數百載。至今青史  
揚清風。福星監司賢太守。民殃至是公知否。

題慈谿顧繡衣追慕卷

乃祖客死丹陽失屍骸

墓。生如客寄死歸故。孫<sub>孫</sub>惟名不死鬼。七尺微軀安復顧。古珍速朽爲天真。烏鸞何薄蟻何親。澹臺子羽魚從殮。公叔樂丘瑗請前。志士不忘在溝壑。何事荷鋏并馬革。石槨千年可固骸。聖體不應有水齧。一官遺恨負明經。線綫不妨公治賢。鉄冠臺府今嶽嶽。桂枝月殿香縵紛。惟公有名爲不朽。有兒爲不死。清尸縱解餘空衣。寧無伏度一坏土。莫追慕。空自感。西山木主應成血。遼陽歸鶴笑壘壘。玉匣銀觴阻眞宅。王季羣跋水  
語見國語

題同年戴憲長蒼山賦別卷

滇東一望無烟烽。魯溪<sub>戴</sub>鎮節歌兒童。一廉如水澈底冽。百鍊似鐵空爐紅。聞道點蒼西特起。靈飄秀技聳海宇。策馬不憚駟十里。雲蒸石骨千竅奇。雪積朱炎萬野洗。堅不磷兮白不滓。地爲河岳人之理。天涯相伴眞爾汝。朝攜山巔天上屋。暮濯山麓海之涘。景高足稱兩中止。凌虛氣岸實相倚。忽來山勢高龍窺。憑高亦任雲盪胸。八荒四海來雙曠。烟消雲散清太

詩

空。作文贈者誰宗工。文氣清勁山爭雄。石紋耿耿雪熒熒。讀之海內驚高風。天書忽報來九重。滇氓憂駕離忽忽。食視不用圖翁容。日日見山如見翁。

### 送范僉憲西巡洱海

秋霜豔菊春肥芝。我將歸歌江海湄。寒梅引風吹歲暮。今君別吾將何之。相望萬里得一見。閒愁洗向天之涯。所見英雄大抵合。盛名清世誰能虛。清風幾夜生榻外。殘編十載嗟燈餘。水天瘴海環岳嶺。太微張翼朝辰樞。溺飢天不生禹稷。蒼生百萬皆蟲魚。況今昌期值五百。瞳已重目彩生眉。精華四海巧夢卜。迸空泣血還誰歟。生平所學欲何用。安敢糟粕輕軻尼。驪駒明朝駕何處。碧鷄筓使臨清漪。有懷萬斛那能吐。百壺未盡黃金卮。踢翻太華作壘麴。離杯倒盡昆明池。紫芝眉宇見在眼。那知地下紛臥伊。濟川天邊既有楫。洗耳山畔亦無溪。由來或去或不去。青山一笑休相疑。

### 題戰功圖送劉永參歸會川

名瓊號  
崑山

雲頭閃閃蚩尤拖。西南昏障海岳那。天關羽檄驚四野。虎頭猿臂分携戈。漫天氣稜一時掃。丹書好事圖爭摩。雲旗鐵騎紛不盡。元戎蓋擁英番番。首函鳳四清油漬。面縛銓哲輕鞍馱。甲兵滇池一濯洗。胭脂萬頃翻蒼波。街前咸嘆漢驃騎。幕南清盡歸來初。天生豪傑安山河。願畢笑返青山阿。如斗金印那用他。遊從赤松諒不死。千年銅狄時摩挲。雲臺麟閣今若何。且聽世世演謳歌。壺山歸去得已多。於戲、壺山所得良已多。

### 題守關忠節卷

並序

正德丁丑、武宗欲徵行宣大、巡居庸關、御史張欽三疏諫止、及 駕至  
昌平、命千戶閻音閻 姓也岳宣守關官、欽閉不納、奉勅印持刀誓死。岳回

報。遂旋鑾。

御史不貴鐵爲冠。所貴七竅心孔丹。閉關手持三寸鐵。誓死不納披忠肝。精誠感激動天聽。六龍倏忽旋迴鑾。舍生臣節不足異。回天力大驚天顏。追思十六年來事。轉危原未易爲安。幾事破犁誰小憤。初謀除劉瑾八黨事失身何惜

詩

詩

三六

天幾翻。披肝泣血非無士。百川既決難回瀾。東都再見申屠蟠。皇朝屹屹居庸關。

### 次方伯東橋詩

兀坐方呼酒。詩筒忽到門。劇憐春興滿。更見古香存。風月籠麟閣。煙霞盡兔園。惟愁勞夢卜。猿鶴怨山樊。

### 其二

啼鳥驚春去。柴車特地來。固知逢不易。未盡興空回。海內思安石。堦前舞老萊。自從詩有約。夜夜菊花開。

余自南贛赴撫山東。陳都憲原習來代。以年誼之厚。操舟送至儲潭。席間賦詩見贈。步韻酬之。

淡雲清曉塞。細草綠春洲。名已三朝舊。心應四海流。威揚新闔闔。別重遠山舟。白首分携意。公乎莫亦猶。

關索嶺

萬里滇南道。驅馳當此危。榆膽裁漢近。烏術落雲遲。自怪乘風疾。旁驚叱馭癡。嗟來還獨笑。莫遣鬢毛知。

贈許節婦

人心真不死。世道自網維。薄分應償夙。浮生敢更疑。桑榆頭白邁。門詐口黃癡。得慰而今後。天憐聖主知。

復周汝實以送饒令人覲詩請校正

詩字五十六。字字若鏗鏘。欲竄難加點。微吹覺有芒。品題推獨步。計別僅三霜。只恐臨歧客。開函喜欲狂。

逢紹之姪

諱麟

早登趙家園。問舟彭蠡涯。每懷輒數日。一別不多時。乍起無條語。初霜未酌卮。烟波風色遠。魚鳥看人癡。

詩

詩

三八

南安趙別駕璧以父母俱上壽同以十一月七

日爲生辰繪上壽杯圖馳獻予同年太守李

彥文屬予作詩美之

八秩齊眉健。人間盛事稀。一陽開七日。初度慶雙依。情極傳佳繪。天  
長恨遠飛。瑤池今歲會。祇把夢魂歸。

題莆陽吳知州以寬可以亭

分足皆爲處。身便意自融。三竿安樂夢。一吹舞雲風。午火空馳急。蝸  
涎豈解窮。兀焉今見此。大庇欲穹窿。

題程孺人貞一

徽州婺源人

白髮今如此。浮生只是過。心將遺託了。人奈未亡何。巾櫛塵緣薄。網  
常世教多。清風金管字。千古遠難磨。

哭黃處士東臯惟堅

心安隨處隱。何必鹿門深。馬瘦靈詩骨。榕清生客陰。曾携巢谷杖。不見披裘金。惟有東臯卷。靈魂不了尋。

鴉小崗

鴉鳥何年去。南溟尙此墟。海腹新拓發。劫遠舊灰噓。水潤性從下。坤容德本虛。不須山上澤。已悟畫前詩。

宴長清張仲寶陳伯孚來訪

見報長清訪。恍疑天降之。已看張仲寶。又見陳伯孚。十載人間遇。千山夢裏逢。清風今夜月。人意亦知乎。

其二

已知話不盡。相見且心寬。世路風煙闊。尊前面目難。緣應無俗結。夢尙未吹殘。明月黃花節。東西各據鞍。

詩

詩

四十

閒中漫興

二首在雲南作

迢遞川原瘦早霜。菊黃槐綠送秋忙。碧鷄金馬看人淡。白鶴瑤琴伴意長。敢忘思波天與闊。自傷癡拙老添狂。朔風也重哀安臥。夜夜追尋到枕涼。

其二

靜裏風情覺道真。天空海闊盡宜人。雲閒不厭交庭影。風懶無心掃徑塵。萬里宦游鴻爪印。兩年舊識燕歸前。鹿車未遂梅花路。慰得高隣載酒頻。

衢州石塘橘

昔過龍陽感舊枝。石塘今見子離離。清霜寒露催金殼。春雨秋風釀蜜滋。畫舫萬籠燕與魏。青林千頃鹿和獅。俱柑名瑤池可有金丹渴。桃畔栽堪此地移。

謝陳秉鈞送醃蟹詩

海味江膏漫策動。汗邪霜冷晚咽雲。酥盤破玉津先溢。膏腹開金酒自醺。  
些饒久能酸措大。糕盤空自飽將軍。從今甘附平南癖。那柄何妨與判分。

### 新春詠

太平觸處麥連歧。吹鬢東風又此期。深喜輪臺丹詔早。不妨渭水釣竿遲。  
漏梅泄柳窺天意。問舍求田敢自遺。把鏡朝來還獨笑。一春花鳥瘦添詩。

### 紅鷄冠花

花名不解作花妍。花似鷄冠像可憐。文憤偏粧丹點蜜。圍鑿再接血痕鮮。  
甘陪菊淡偕梅瘦。不惹蜂狂與蝶顛。歲晚朱顏誰更在。寒盟如此共年年。

### 和少參陳龍山僉憲張白山遊冰井寺詩

冰井消塵盡日清。山林燈火映星明。乾坤寤我三生夢。烟月添人一種情。  
杯付江湖思舊侶。詩愁魚鳥結新盟。白山節鉞龍山印。管到風花次第生。

### 補白沙口哀詩序

詩

嗚呼趙與瑒死後三閱月，而宋亡矣。自阿里海涯戍鄂以來。數年之間。荆南江廣。望風迎降。間有如高世傑、李芾、馬瑄之苦節拒敵。亦不過斬首自盡而已。豈有若此裂殺之慘哉。且當此時。西來迎刃之大軍隔海矣。同心之應科已死矣。宋之土宇垂盡矣。豈不知大勢之去。螳臂之不可禦。然所以泄其憤。堅守以固其節者。心焉而已。宋室守臣。死節雖多。豈有後於與瑒者哉。然以遠土孤臣。史氏不爲立傳。續綱目者。不爲大書。可惜也夫。雖然此猶食祿也。若謝明謝富冉安國王之僕輩。郡士爾。服死已難。而又甘招割磔。尤何烈也。然或知幾許。欽廉高化。糧積既爲史格所運。獨盡室餉困以濟。冒浩濊而不辭。馬旺既主其郡。猶篤一心。日致數警。檣旗報仆。帝屍久浮。黃威速等尙未甘心。詔置極刑而不悔。卒之海陵潰散。臣卒數千。皆不他適。特嚮念而遠依焉。其精誠意氣之感召。又何如哉。噫瓊去中原

萬里。朝廷政澤之霑獨遲。國之亡也。人心固結。獨後於天下。豈三百年恩養之所致歟。抑張趙二使君。當日之義氣激與。或人情土俗之美。而自不能已歟。故論宋三百年之天下。其先人心之歸也。始於陳橋。其後人心之不忘也。終於瓊海。所謂後死之雖將。不希秦之齊士。閉城之魯民。皆兼而有之矣。孰謂南荒之外。而有此地也哉。桐鄉外紀。有哀使君義士詩。而不及民。茲特彙裁以補云。

### 哀百姓

輿圖二百盡皇州。宋室遺民尙有不。松柏誰捫共客腹。絃歌未散魯公頭。忠魂幾許隨波恨。孤旅三千特地投。那道深仁炎趙錄。無端氣脈向茲收。

### 瓜州阻風

以下三首見粵東詩海

萬艇漁燈半晦明。稀微海角曉雲輕。山連北固青迎眼。水激中冷白拂旌。盡望潮濤烟鳥影。終宵風雨蒹蓬聲。茫茫天塹分南北。不盡行人今古情。

詩

四三

詩

寄酬王廷信贈別韻

山客原來久戀村。桃花休笑出桃源。風雲天上驚回夢。犬馬人間未了恩。  
湖好知章終乞鏡。檄忙毛義苦臨門。秋深白酒黃鷄并。席上應留醉我尊。

憶朱南岡少參

曲靖歎看候火紅。疎簾孤館自生風。已呼厨急開清壘。可奈天留憶戴公。  
萬里越燕初夜永。幾時江海更秋空。想應鮑叔心如月。處處還隨照短蓬。

阻風

蕩槩順隨流。柁樓高妬風。去來同一意。那敢怨天公。

題江西雲厓宗室卷

飛雲呼不來。歸雲還自聚。金枝滿厓春。雲任自來去。

訪趙忠簡墓

諱兼

澗溪躡轍香雞呼。南度乾坤兩手扶。竄逐不妨青史路。塚迷瓊島未爲孤。

### 關羽瀨

破虜忠名萬古秋。三分割據百年休。漢臣漢賊癡還慧。何用生兒似仲謀。

### 包茅山

三脊不供誰縮酒。六千地總付秦黔。青茅常共荊州在。罪與齊桓數到今。

### 果化州

花引醒眸鳥叫愁。荒夷歲晚亦奇遊。黃茅紫磴疑無路。一抹烟開果化州。

### 喜鵲

仍無景泰初指揮李翌自高化取確維十餘縱之城隍間迄今孽育近縣多有之

橫斜銀漢仙橋遠。派衍金籠海國賒。地氣北來知世運。喳喳傳喜遍天涯。

### 右西洲公詩共四十二首

### 送周清溪先生福州司訓

從真山周家譜探入

### 西洲

詩

四五

詩

四六

廣文官冷未爲貧。木鐸聲高道自尊。二載烟塵辭九陌。一襟風月占三山。  
久甘苜蓿寒牙嚼。肯厭蟲魚白首剛。濟濟英才星斗望。古風遠矣看追還。

### 名公紀遇

于時予與許太尹時泉蓋新知也

長雲不離天。森林不去地。俯仰斯人徒。天地同氣誼。千里亦匪遙。並  
駕歌戾止。人生重相知。何論疎皆異。一蓋孔程傾。杯酒元黃露。誰云  
此襟期。古今乃殊致。緬茲良晤難。好懷安可賞。莫惜携手遲。但願斷  
金利。仰首思停雲。元亮有同志。世路崎嶇多。轉盼忽如棄。贈子寫綢  
繆。永慰旅中意。

### 題張鶴野鳴鶴圖

鬱鬱望青野。昂藏有仙姿。衆鳥不比儔。孤高自幽奇。嗟然向空嘯。慷  
慨舒光儀。零零祥露降。裊裊清風隨。凜凜寒威闕。蕭蕭夜氣吹。翫茲  
狀性。豈似浪味伊。孤琴下雜宣。千載空中詞。清晨人雷鼓。洛陽遠

聞之。何況凌雲岡。鈞奏迭笙箏。誌公巖林麓。庚子啜孝思。何況托王土。寧忍噤明時。徽音不多得。一鳴震天達。鷄鳩旣屏跡。鸞鳳應相期。但作盛世鳴。不爲墮網羈。繫彼啄羣鳥。終日受拘縶。含聲樊篔簹中。低俛徒凄其。悠哉九臬情。舉世誰能知。

初二夕報南川遠行終夜思之追送至白沙

又戀戀至暮

日暮驚傳鴈。更闌未帳牙。榻前千種思。燈裡數圍花。迅去南川馬。輕追白水沙。情知難作別。暹落晚天霞。

贈王指峯司教定安

職清終是貴。路近即爲家。鴈報千金易。雲瞻一路賒。座開新幕客。錦爛故園花。長晝閑蓬枕。春風自放衙。

和鄭篔簹溪不寐韻

名廷壽進士時官御史

詩

四七

詩

四八

坐久臨更寂。歌濃伴月明。旅懷頻戀目。殘籟苦吹聲。燈信花前結。春容酒後生。遙思寰海客。休感幾關情。

贈符澄溪子赴南雍

金縷春榮樹。鶯啼曉破烟。泮池觀海近。雲衲淬鋒先。萬卷書檠架。三秋榜麗天。燕臺杯送劍。不是蕩離筵。

過庾嶺有感

雲嶺何年闢。揮鞭此日行。步高天轉近。眼闊景常清。勳業空前古。乾坤著大名。太平有幾相。屈指溯前生。

甲辰仲夏八日寓黃塘憶洞元吳子歸南海  
予至此已半月餘矣詩云渡海蓋遙度之  
也

關山重山外。相逢漸面非。片雲浮日遠。孤月照形稀。渡海舟應到。朝天馬正飛。蒼庭春晝永。囑與報歸期。

### 送彭密淵別歸

白雲天上密淵子。滄海人間此日來。踏遍塵寰萬萬里。回首四望忘崔嵬。主人留子一年好。見子欲別心如摧。去去仙風何處約。眼前金馬亦蓬萊。

### 送彭密淵談仙適弟存吾以詩約彭赴羅浮武

#### 夷子不能赴賦此

欲向鴻濛問路遲。海天相遇欲何之。黃金丹訣原非幻。白首禪緣亦自疑。天地幾人能不朽。靈丸一點本相隨。與君話到無窮處。不說羅浮卽武夷。

### 自吳季明飲歸有感

百歲龜驚三日別。寸心却似千里違。吾懷不盡燈前酒。君意猶加雨後衣。聞於歸時遇雨季明惜無雨衣。欲托雁魚書尺素。還疑形影到柴扉。人生最惜銷魂事。幾度相

詩

思夢裡依。

詩

五十

甲辰仲秋同內齋至姑蘇江口因東陽年兄擢  
台佐守之報遂別去台約明春訪予於金臺  
然內齋於東陽舅甥至懿也予於內齋乃白  
首知己也思其別憶其來情自無已詩以將  
之

仗劍遙同萍水遊。那堪江柳又分舟。知音人去絲桐冷。倚玉筵開叢桂留。  
白首行藏緣我定。青天肝膽許誰酬。相思獨望三秋月。猶憶春光共上樓。

舟中探珠子贈陳獨庵

興來相賞景何如。渺渺青天數一珠。日暍初看偏隙白。月低還眺半湖虛。  
輕圓留點穿來好。有孔含光照裏無。何日行逢驚訝。刺虛。



集 芳 傳

謝人見惠香品

軟著絲羅細裹丸。香風款款透心肝。人間何物傳來異。掌上閒封墨水乾。  
一水紅梅憑落葉。百年仙遇喜乘鸞。前生蟾桂今宵月。漫抱陽臺作夢看。

題陳南陽樂園

已伴光風五十春。興來此日復清芬。劇憐窈窕宜仙侶。未信金門有散人。  
笑對花間還坐晚。醉忘甕口更開新。南陽勝景看無盡。留取瓊玕贈好因。

寓石頭城七夕借與

設說莫愁臺已古。更看秋夕鵲橋新。驚心牛女何時約。乍眼姮娥此地親。  
經歲燈花剛過漏。隔溪烟柳又逢春。無端斟酌天家事。不道人間亦寫真。

和閻聚奎子遊學萬軍

丈夫到處是豪遊。萬卷生涯此擔頭。道大渾忘天地老。心閒那解利名休。  
巖封去去黎侯勝。桃李森森狄圃收。一枕詩成君正別。錦囊端副友生求。

詩

詩

五二

贈王指峰教諭

得宸字韻

文翰曾經品玉宸。綵毫搖映泮池春。杏壇化雨衷心遠。水暖江清壽興頻。  
官近故鄉風習熟。堂登大雅廣陶甄。諸生謔笑阮囊澀。游詠偏多得句新。

元宵輿閩天秀老友賞月

一杯喜趁月明圓。如此春光肯負不。燦燦銀冰垂綺席。盈盈珠玉映雲樓。  
景好多開陳世笑。花狂還上老人頭。相逢莫浪尊前放。白首今宵幾處遊。

送廣信吳醫士

業傳三世丹初熟。藥轉千爐效更奇。喜我有緣逢葛老。令人到處說盧醫。  
一身無病懷常勝。四國多瘵夢未稀。我技非醫心却是。蒼穹何日慰蒸黎。

補題曹叔岡鐵拐仙圖

眼開白日空今古。手把輕雲任指揮。寥落生涯壺口外。渾忘天地是雙扉。

答蝶岡寄韻

天涯那得此離言。寄到羊城九曲軒。我有深情隨逝水。願從南海浹涓涓。

咏梅

不願冬殘自在妍。笑將疎影鬥嬋娟。小軒不用垂簾幕。吟到花香句欲仙。

贊文邑韓機訓妻朱氏守節氏

金石爲心鐵作肝。備嘗艱苦不辭難。相隨淪歿孫和子。獨抱松貞耐歲寒。

右養吾公詩共二十四首

自擬輓辭

聞道悔已遲。枉生非我欲。奇志負初心。介性那堪俗。父沒行無成。未能善式穀。自知逆天命。九祖陷鬼局。抱此不測罪。雖生名更辱。願辭人世緣。甘心受地獄。天憐此生念。魂托應有屬。懷哉五雲仙。視同眞

詩

詩

五四

骨肉。我願執其鞭。相隨捧馬足。委尸無輓客。有稿憑誰錄。錯箇好人身。死生同証促。

### 新婚別

人情濃交始。况兩俱少年。席同七尺軀。誓合百年緣。尊嬭景臨暮。雙雙坐堂前。看我兩人拜。一笑開春筵。一生無契闊。誓如金石堅。豈知命途舛。兵火三更顛。見我顏色好。黑索苦相牽。一步一下鎚。迫我度山巔。丈夫不忍捨。棄死走山纏。又怕刀鎗凶。遠號盡一言。此情難話了。瞑瞑東方天。滿目太平世。干戈何慘然。人生積難制。矧乃並頭蓮。本是天生合。今爲人事遷。此身雖去。心內苦還還。若得數年好。此念亦少捐。不惜爲君死。瘞圖後會還。半壁初生月。何夜重團圓。

### 客夜

對客鳴琴罷。孤燈照寂寥。眼穿千里月。腸斷一聲蕭。鏡裡人應瘦。秋

邊客更焦。未除煩惱障。何處不魂銷。

### 宿虞洞館和戴黃門韻

身世歸何處。行行趁曉鷄。客逢情上好。家在望中迷。有夢知花恨。無聊任馬嘶。自慚心未了。南北又東西。

### 晚坐

鷄栖斜日暮。犬吠喚鴉忙。酒醉詩魔壯。琴疎指甲長。春情憑夢了。野思爲塵荒。獨坐青苔軟。無風花自香。

### 傷旱

龍懶誰鞭得。端妍肯借津。訟風文自巧。投魘話非真。火稻熟翻白。山花瘦更癯。銀河無限水。一滴不分人。

### 秋夜偶書

天氣重陽老。柴門菊未花。漏床多苦雨。村夜不聞笳。窗眼風來急。山

詩

頭月落斜。秋悲無奈處。又得數聲鴉。

詩

五六

### 觀盒中金魚

水浸玻璃界。環生異樣花。點穿青菱蔭。遊撥綠萍遮。細殼堆新錦。晴天散曉霞。可憐顏色好。不得大生涯。

### 贈友人遠遊吳楚歌

我嘗欲入五雲中。身騎丹鳳乘黃龍。上天下地景無窮。西天謁佛祖。東海拜仙公。脫離塵世覽長空。約隨去問先天翁。誰知此身無仙骨。居焉仍在一畝宮。而今君向吳楚去。正是世界紛華處。江山第一放眼開。人間何物可着慮。歸來共話無窮趣。

### 直釣吟

年來隨人釣溪側。終日不得箇魴鯽。特向漁翁問其然。笑煞羣兒還未識。人釣曲。我釣直。曲釣遇魚便可得。直釣空餌送魚食。及見玉川吟。古墨

真到。我今亦欲打鉤曲。只恐傷魚口血出。

壯遊嘆

送陳彥病後友出遊避禍

眼界不開心胸寒。腳跡不廣眼界窄。自古賢聖與仙佛。生來何曾戀家宅。  
天地生我本奇特。近年人事日蕭瑟。奇志汨沒頭低垂。自恨自壞將誰責。  
惜昔曾爲公子行。畫船簫鼓真煌赫。紫蓋辟人無官職。方伯避車山道側。  
當時先君愛教我。名山携我登覽星高摘。可憐年少無知識。江山妙處未曾得。  
歸來胸中還馳憶。有時講論求精闢。如今正欲出遊觀。堂前老母半垂白。  
勝境於人多逆格。寥寥斗室孤吟客。琴詩一會只八人。惟好琴詩交不擇。  
有托而逃混下流。誰知威法相驚嚇。嗟爾爲我家破蕩。欲向江山探奇迹。  
山中淡酒亦堪沽。路畔啼鶯空痛噴。花嬌草軟滿眼明。詩謀何處非良策。  
君如浮萍無常跡。我似井蛙徒闕閱。人生行藏難自期。離合悲歡不定額。  
一曲離歌夕陽陌。停雲散盡驚秋色。

走筆題友人笑遊海宇卷

詩

詩

五八

笑大道。空難掬。笑人情。多反復。笑雲易散。笑風狂。笑山巉巖。笑水曲。笑  
 花開落無定形。笑天西北有不足。笑地東南窪陷多。笑海翻波高過屋。笑  
 月圓缺笑日陰。笑時無事分寒燠。笑鳥飛鳴入羅網。笑魚泳躍遭罟罟。笑  
 虎呈威白鹿吞。笑龍變化神能屈。笑佛有靈巧拈花。笑仙白日忙飛速。笑  
 琴不遇知音人。笑詩未奇驚人目。笑醉不知雷雨聲。笑夢未了黃梁熟。笑  
 生只爲饑渴忙。笑死專聽妻兒哭。笑官憑法任重輕。笑客爭逐圖酒肉。眼  
 前何事非可笑。笑老乾坤忘榮辱。君今避禍向遠行。朝笑遊兮暮笑宿。我  
 今甘與世談諧。欲笑不能常僕僕。誰能忘笑隨世緣。胡盧開口任窮處。

### 答碧山陳翁夜談口號

月輪半壁向西斜。翳眼中幾樣花。燈影無風偏自動。獨吟有恨爲誰嗟。  
 碧山陳翁春老開紅杏。孤鶴秩公道號田荒餓白鴉。秋竹亂敲喧蕩甚。敢傳聲到  
 老仙槎。

### 答吳瓊羅

秘苑從何如。碧染狂風葉。明日豈知山外暗。青松空向夢中虛。  
半生未得消詩酒。千載誰爲記毀譽。正愛江邊葦草厚。得同麋鹿到華胥。

### 答五羊梁存吾區白齋詩箋遂和原韻

千里同心豈偶然。琴詩應許我隨肩。情如白雪宜三弄。眼見青山又幾篇。  
明月精神無夢擾。浮萍身世任風牽。何時茅屋煙霞裡。磨劍歸來趁壯年。  
琴詩原不浪浮名。千里無心得識荆。階上瑞蘭應有種。匣中寶劍尙能鳴。  
斯遊在世真奇夢。何法於今可當情。髮白眼青天色好。江門秋月正空明。

### 答雙溪兄簡即步原韻

西郊有路透東郊。塵病情牽萬里遙。啼鳥不愁秋出院。好風常帶水過橋。  
此時酒醉醒還夢。何處山堪漁更樵。夜半月明簾外坐。不知花影爲誰嬌。

### 與知友看舊稿

生來事事可傷心。開口何曾有好音。自是不平方嘆息。休嫌未病學呻吟。

詩

詩

六十

元猿叫月霜初冷。杜宇呼春血不禁。滿眼英雄都得意。誰能爲我淚沾襟。  
**病久與友人話舊**

別後惟輪月到庭。酒妨多病得常醒。落花更覺傷春切。啼鳥那堪着耳聽。  
運去君能安困阨。年來我亦歎孤零。一燈話舊渾如夢。相對無聊尙眼青。

**客中七夕**

昨夜江中雨洗車。夢回宮禁憶東華。化生盆裡曾留種。乞巧樓前未散花。  
烏鵲已成天上路。江山還隔海邊家。無情離別心何許。要借當年奉使槎。

**過兄處陪李三吳四諸人即和原韻**

昨夜春堂倒玉卮。詩歌奏出十分奇。東風醉眼花偏好。明月看人酒更宜。  
自信生來惟愛笑。深慚夢裡未曾知。兄酬弟勸何妨病。今日重逢莫厭遲。

**懷坡堂與僧半壁話步牛洲翁韻**

塵世生度歲華。談禪半日見無涯。惟憑靜坐思三教。每遇高僧話一家。

定慧寺名青島。色空聊種佛桑花。猶知宋代東坡老。半夜晴天吐彩霞。

### 和月洞仙師韻寄僧無已

忙裏偷生了未忙。安心聊當眼前方。求仙已許飛騰藥。對佛專燒解脫香。却恨此身真臭袋。不知何物是禪床。他年定作淮南犬。看守出門紫翠房。

### 訪西林兄樂耕亭竹下看奕即事

西林名郊丘  
文莊公曾孫

竹底圍棋看亦清。到人敗處也心驚。蝶隨香影忽飛入。鳥愛濃陰時宿鳴。飲酒舉杯應怯病。倚欄無話不勝情。生來幸會豐年樂。一片黃雲接郡城。

### 晦夜雙溪兄來訪和韻

獨坐山村一草亭。交窮更得性情清。敲門却笑苔新破。涼夜何妨月未明。半世爲多憑病懶。百年誰與了詩盟。相逢且拚燈前醉。身後寧知記姓名。

### 月蝕

團圓纔放此宵奇。誰解翻逢正蝕時。點綴未驚仙女夢。昏迷空障桂花枝。運衰多在清明世。身賤何須詭怪詩。從此不教情着我。任從歡合與悲離。

詩

與友人乞素馨花

愛伴清香養此情。只因性懶却空庭。帶長方繞紗窗草。水煖惟生石沼萍。琴韻淒清春有恨。花魂寂寞酒難醒。名園雨罷風光好。應許詩狂乞素馨。

咏窓前白鷄

不似虞庭錦樣斑。也傳五德在人間。階前啄食苔千點。窗外啼晨月一灣。清色何曾沾雨露。短翰那得逐雲山。塵籠未脫渾如爾。却笑雍陶起放鷄。

自咏海天孤鶴

秋海霜天放眼青。雪衣丹頂破雲輕。線山便欲辭塵世。華表寧堪寄好聲。赤壁夜深人未夢。沙場箭落客空驚。不知何日能歸去。直到珠樓十二城。

和行甫姪咏菜

野花青青半頃疇。蝶蜂何故傍人遊。元都淨盡千年恨。老圃清香一味秋。嫩葉安排青玉案。新莖抽出白芽籌。咬根惟願汝知味。百事如今愧未酬。

敬題唐西洲公三父子詩集

奇句開風雅。最盛惟有明。人才炳蔚起。卓犖命世英。勛業繼張余。理學宗

朱程。文章氣節著。史策留定評。名山藏著述。海內已風行。人人有專集。長

留沒世名。欲求稱花夢。二賢增光榮。淮前有王氏三賢集舉世誠難得。豈易見文貞。李文貞

貞兄弟父子有集巍巍唐西洲。一代名公卿。孤忠矢報國。抗疏犯顏爭。明堂大禮議。

廷杖心不驚。盛世容直臣。放歸隱躬耕。餘事爲詩歌。遺興寫性情。表章忠

節義。白沙口哀詩忠簡墓守關忠節卷與說節婦詩浩氣炳日星。哲嗣禮部郎。善述香繼聲。橋梓世濟

美。不讓澄與京。京吳章盛先生子名高懷託吟詠天橋抒性靈。仲弟有仙骨。孤鶴海天

鳴。遠遊厭塵世。傲屣輕簪纓。五嶽賦歸來。歷歷叙平生。是父有是子。難弟

與難兄。一門學詩禮。大雅何深閔。傳芳保勿失。不隨時代更。述祖陶彭澤。

誦芬陸士衡。書香十餘世。挖揚明德馨。小子生也晚。獲窺著作庭。明賢

集百家。遺佚歎飄零。欲旁搜遠紹。杞宋不足徵。丘(文莊)海(忠介)王(桐鄉)

詩

六四

忠銘（陳檢討）外。不聞有殺青。惟此傳家學。奕葉多明經。瓊臺編文獻。考校  
須求精。壽世傳不朽。百代奉典型。

民國十一年舊歷七月中澣同里後學王國憲敬題

# 海南海叢書單行本

▲海—南—書—局—出—版

▲丘海合集

著者阮文海 海忠介  
全書三冊 定價二元四角

▲天池草

著者王去非  
全書二冊 定價二元

▲鷄肋集

著者王佐  
全書一冊 定價八角

▲淵芳集

著者邱府唐  
全書一冊 定價六角

▲陳中秘稿

著者陳是  
全書一冊 定價六角

▲陳檢軒

著者陳精  
全書一冊 定價八角

▲石湖遺集

著者邱廷  
全書一冊 定價六角

▲北泉草堂

著者許忠直  
全書一冊 定價六角

合編

著者邱廷  
全書一冊 定價六角

▲松蘿小草

著者王去非 王永烈  
全書一冊 定價六角

▲白鶴軒

著者林漢英  
全書一冊 定價六角

▲抱經閣集

著者王去非  
全書一冊 定價六角

▲關道堂稿

著者吳謙  
全書二冊 定價一元

▲筠心堂集

著者吳謙  
全書二冊 定價一元五角

▲瓊臺詩話

著者邱文莊  
全書一冊 定價三角

▲溟南詩選

二冊 實價一元五角

▲海外集

二冊 實價一元

▲感恩縣志

三冊 實價二元

